

湘綺樓日記

二

湘綺樓日記

光緒八年壬午

壬午歲正月戊子朔陰有雨兒婦諸女爲仲章設奠卽往哭甚哀余未往
臨待奠畢乃起朝食陳生彭郎楊兒子壽均徑入相見胡郎子正入未
相見昨夜膠緹及三長女未眠日中各倦薄暮余亦少寐至亥正乃寢
二日己丑雨水陰賀年客十數未見一人清坐側室一無所爲唯看小說
遣日夜一登樓

三日陰晴佐卿來言曾郎重伯欲來談遣約登樓坐一時許博涉多聞校
余幼時爲知門徑語亦不放蕩美材也惜生華臚譽之者多恐因而長
驕耳今日頗寒客去少臥片時便暮矣

四日晴始出答諸客從南門出至

先墓並拜陳母墓看豐殯宮復入南門至四母陳妹家循東城至子壽佐

卿陳生處餘俱未入壽家遇力臣羅瀛交佐家遇夏子常皆略談夜聞呼梟聲云練軍共罾擊其營官新撫始至試其火色也蕭章京送京物六種云卽往岳州還再相見

五日晴復拜城西南諸家北從笛仙始入談者莊心盒龍際雲餘皆未見還尙未暮夜月甚佳過筠仙處與曾郎雜談無章

六日晴爲文心書柱撰二句云

壁立千仞猶恐未免俗兼包九流而後可說經

頗能自道其所得

文心濟生俱來談午後香孫佐卿約過錫九談又要佐卿同至余家晚飯畢步月出游至任翰林張金剛曾宮伯張文心處金剛復與余同至吳昀谷寓少坐還月未落

七日晴以外間頗欲議論湘軍志長短與書佐卿屬告諸公燒毀之步出訪閻相文胡穉翁瞿春陔登定王臺夏糧儲約飲未至守者頗相疑遂出至城東民舍皆滿無隙地復出瀏陽門望春還欲訪傅清腴遇夏鹵

簿無可避仍還定王臺頃之清腴蓬海但少村畝谷劉定甫俱至坐談
最久將夕乃設食未夜會散步月歸

八日陰晴避客樓居作人日登定王臺詩殊無格調詞不掩意故也小睡
片時得郭健郎書言蜀督幕客內閔已亦幾不免游客分黨極爲可笑
然朝廷門戶亦復何異以彼嗤此猶未達也夜與寢緹言親友貧者我
雖日至而彼不一報於心無憾也若富貴家則責以報酬此與趨炎嫌
貧者顛倒其見同爲勢利而行之必如此乃爲高誼人世浮濁行不可
過高孔子所以游方之內

九日陰晴我女猝生喉蛾甚危急迎陳妹小姑卜孺人治之一鍼而愈我
女自言夢一老姥右提筐左牽牛呼使往就治我生時有牛祥疑此神
人示應也紛紜一日皆無所事

十日雨始治家事命功兒攜恆子往校經堂約胡子威讀書除樓上下間

使三女稍長者居下間自攜茺居樓上盡陳經史諸子以待檢閱費一日力始清羅嬰昨來彭郎峻五午來皆未暇久談夜復樾岑書得夏芝岑詩函

十一日雨寒子壽頻來相尋恐其有事往訪之因先詣蠡叟入談復過校經堂見城南書院舊基殊逼促不可居堂生四人唯蕭生不堪選餘皆近雅也子壽實無事亦無所言留飯未喫而出至劉定甫謝小莊兩處而還鈔禮經一葉彭峻五來夜談

十二日風雨欲雪登樓理業瞿郎子純張力臣左錫九來皆久坐夜寒未事

十三日陰雨寒甚擁被眠至晡乃起將作字覓故研未得家中便有陵谷之遷殊爲可歎毛妹來言蓮弟約與其外婦同死已服鴉片矣遣人視之殊不然此事乃一段假情史亦余寬縱所致遣人告保甲局逐去其

婦

十四日陰晴笛仙來鈔禮經一葉蓮弟逃去

十五日晴夜月而忽雨余佐卿來坐半日去

十六日晴鈔禮經一葉半山出謝客移兩女西室讀書余仍居樓今夜癸卯驚蟄半山夜還懿兒小疾夜暝眩頃之愈璫盼始夜講

十七日晴鈔禮經一葉錫九來論湘軍志版片宜送筠仙余告之云吾以直筆非私家所宜爲衆掩覆毀版則可外人旣未出貲屬我刻而來索版是無禮也君不宜爲衆人所使且置身事外以免咎尤此板吾旣願毀之又何勞索錫九唯唯而去懿疾未愈其母終夜不眠

十八日晴晨得外舅書及幼二書均言田事莊心盦楊商農均來久談欲出不得去申初始出答訪王老虎大恨丁穉公唐鄂生云誣其宿倡出示原案本亦多事此人雖筆撻之不爲過然罪不在宿倡也日色尙早

連謁數家均未得入至劉馨翁處會飲傳青萸郭筠仙鄧雙坡藩使劉培元總兵均同坐三更始散

十九日晴石路始乾張金剛早來未入頃之復至云云鈔禮經一葉功與昨歸視懿病校經堂生成贊君黃澤生羅伯堅來極言治經之要在篤信經莫怕傳注此余生平所得力者孔子云爲之不厭誨人不倦若專以解經而論庶幾可以效此十一弟病留省城過年竟不相告今日始來相見切責之云汝欲陷我以無親耳子弟不成立千奇百怪悶人步出訪香孫佐卿視黎簡堂病未能晤言見其二子意忽忽似不佳途遇商農索挽聯

雲喬 京華讀書最關心叔子科名頻望燕臺愁白復
鄉校尋書老方準擬九旬秩養遲悲黃水送經銘

過筠仙少坐聽其談力臣反覆事殊爲可樂余近年學道有得庶乎齊物論矣笛仙云莊子快活一世卻牢騷一世甚不然也夜月甚佳

廿日晴早起遣送湘軍志版及所刷書與筠仙並書與之言本宜交鏡初

今從權辦也錫九來孫涵若常霖生繼至與論可與共學謂略通九流
知天下道術無不在則無不用無不學會滌生庶乎近之然心眼太小
有時不自克故未可與適道也余則從容優游無所不窺視天下是非
利害不得至乎前可與適道也然結習多意氣重心口快言行相違身
心不相顧故未可與立可與立者當世未之見以共學適道後之立非
伊尹伯夷不足當之楚屈原其亦可乎諸子則尙未可共學而其身分
高於曾王彼非學聖人已造其境而未窺吾門猶之次國之上卿似高
於大國之下卿也錫九來陳妹來欲出未果鈔禮經一葉暮看新柳攜
茭步舊湖隄

廿一日晴鈔禮經一葉閭訓導正衡來談石門穫稻露積月餘乃取粟武
陵銀錢取息最重楊杏老家貲可十萬曾靜齋家貧猶有萬金今主朗

江書院云云

廿二日晴初春麗景從來少觀心緒煩膂負此佳日可惜也曹价藩熊鏡生來出過蓬海答詩傳屺生竹湘因與青餘談湘軍志是非出南門詣芝生遇一客見濟生者自避待於客坐之外芝生出要往學堂胡子政亦出坐久之將飯乃出過夏糧儲陳杏生而還佐卿來言筠仙立社教訓後學余以爲不宜以凡起一事不可自爲本約同志聚論而自尊驕是貢高也今日欲雨未雨聞段培元之喪

廿三日晴錫九孫涵若徐甥陳杏生來鈔禮經二葉徐甥言縣志復議屬我余言此公事宜送縣令縣令送我乃可耳本約羅研翁死則爲續成之今亦不辭也凡本縣人修志但不言潤筆則無不可爲天下紛紛俱入利門可慨也族人大滿弟春齡子來言買田事

廿四日晴午後復陰似欲雨春氣萌動百草怒發胡穉泉徐子雲楊商農張雨珊來並久談子雲言馭子庚姪俱入左督幕中左公不擇人如此

猶有承平風度鈔禮經二葉蘇元春家有儒生旦夕伊吾似甚好學雨
珊言其族弟百禱好學虛心可入校經思賢之選陳池生卒於開封作

一聯挽之

生從虎口來竟支持忠孝名門有子承歡依節母
幸不鯨波去正理料琴書小住阿兄扶病送殘陽 彭子茂妻

鍾氏挽聯

卅年佩戴總劬勞鹽米操持內助稱賢悲獨苦
三峽驚憂甫寧帖嬰兒環繞含飴可樂遠先祖

廿五日晴昨夜微雨溼階起乃知之大滿等晨去起送遂登樓鈔禮經二
葉午步出答訪鏡生雨珊復同雨珊至孫涵若處夕食坐客錢 皆其
姻戚夜至心盦宅談得穉公臘八日書

廿六日晴始煊易絲衣鈔禮經二葉唐繼淙來見云欲游浙干俊臣並獻
塵土條陳余對之驚髮畢猶未欲去乃與俱出訪曹价藩未遇至志局
與閻王小坐觀其志趣各有所挾持忽焉不樂遂別去循城直南至校
經堂看兩兒功問禮記疑義殊不似曾讀吾書者乃知比其弟大遜初
亦未料其如此也過視陳妹卜經歷逡巡向暮至姚立雲家會飲坐客

先至者雨珊蓬海李次琴陶又瑜後至者吳昀谷陳海鵬多談詞曲尙不傷雅

廿七日晴煊陳富春來言程生疑其父墓名有礙目者俗論難悟今乃見之余告以可改削而不必告我也羅郎伯存來言今年無館羅小沅來言縣志不可改及聞曾沅浦與余參差余俱唯唯鈔禮經二葉磨墨如碾沙殊快人意發蜀督復書夜訪章鎬芭孫

廿八日晴熱李和笙章芭孫來李爲金門從兄之妻兄曾請作其母詩序久忘之矣讀之文甚雅飭因令錄一橐文心來言龐司使怪余不拜客又問曾沅浦事此事不可使官場聞殊恨閱牆也子威雋五驗郎同來子壽強欲入語惻款可憐余感其誠以正論告之有人云其僞疑莫能明也要之余言無過亂門其義甚正亦不計人之相負否矣鈔禮經二葉始聞蛙聲

廿九日陰煊鈔禮經二葉歐陽接吾來

二月丁巳朔始謀家事功兒歸爲其弟設朔奠陰暄出弔子茂妻喪本請陪賓因天熱春服皆未備自檢四箱至午乃出弔客來者多不相識少坐出答訪林綬臣黃子明還少睡夜起登樓鈔經一葉覺骨節蒸痛似是溫證急返寢室熱大作四更乃解

二日晴鈔經二葉少牢篇畢張冬生楊芷汀

湘潭人

來復鈔喪服一葉漢制

有六尙冠衣席浴食書也昨夜有盜登巡撫圍牆刃傷一更兵又有四人服藥求見巡撫自云齋匪送長沙獄未至道死衆皆以爲妖異今夜房嫗聞行聲誤以爲盜至驚余寐未幾聞長婦娠起就側室眠夜雨旋止

三日己未春分風稍涼可重繇彭翁來言外間以余毀程朱爲異端宜切戒之余云吾家解異端不如此此不問而知非我言也又言及諸生庭

辱易海青以爲我主使此翁憤憤乃至此不足與之言陳吉生請陪弔
已正往申正還長婦生女或從此可蕃育以彼頻舉三男皆幻泡反不
如生女之無憂耳夜登樓鈔有司篇二葉得和合書

四日晴蕭岷山來久談云卽日上衡午步往送之未遇入城至朶翁處縱
談立身處世之方正告以流言止於智者之義所云止者不獨不信且
不辯也又談春秋禮經聽者十數人晡後復出城至蕭舟略談還過樾
岑不遇登樓鈔經二葉

五日陰昨暮得鄧郎書云非女病重懼已不起念坐待凶問不如自往看
之命往附船卽行孫女洗盆出見爲蓬海看詞卷朶翁看楚詞註竟日
蓬海來談頃之小雲來看外孫女亦登樓與蓬海舊識長談忘日之暮
客去飯罷登舟南風不可行仍還家女婦勃谿爲開陳道禮復登樓少

坐無事早眠

六日陰欲雨樾岑約早來過晨始至略談旋去遣約佐卿來縱論賢不肖相去之遠及處世無聊之周旋非有道者不能一日居也舩人報當行將暮與佐卿飯罷出城小舟甚寬附舟客二人行十五里泊靳河靳尙故里也適欲註楚詞而宿靳里乎夜雨

七日北風陰雨稍寒晏起已至萬樓矣泊張步在倉門上遣龍八往仲三家問訊釋離騷至靈氛章止引水經註證女嬃爲旣放後歸里之事信文章之有精神千載如面對也頃襄旣立屈子得還雖未入朝而可自便故還秭歸而游沅湘非被放也後再遷江南則禁錮矣夜雨瀟瀟北風簸舟安眠至曉

八日陰晴鬢髮讀楚詞評釋九歌尤傷心於山鬼蓋鬼者遠祖去壇之號故篇中疊言公子楚棄夔巫而弱亡屈子獨欲復夔以通巴蜀宋玉傳其說此自古智士祕計奇謀至余乃始發之雖或謂屈宋所不到而此

策自是弱秦復楚立奇未經人道者也余今日亦有弱夷強華之策無
由陳於朝廷用事大臣聞者尙不及子蘭能大怒其情悲於屈原而遇
人則亨矣古之傷心人別有懷抱漁父詹尹豈能笑之乎舟人攬載移泊
牛矢夾楊梅洲尾地名也夜月繇星悵念少時游宴歡愁之緒由今視
之皆如嚼蠟

九日陰晴西風辰初始行讀九章九辯倍離騷九歌猶未遺忘昔居石門
時與非女功豐續誦楚詞至今其聲在耳而三子離別死病相尋追念
故歡眇不可再唯此一卷新有詮釋光景更新使人有棄世上仙之意
行六十里泊石潭羅伯宜賭喫米粉蒸肉地也今亦成故事其父子俱
歿蒼松老屋空矣

十日晴南風寒重行二十里過文家灘舊游頻渡之地也四十里泊湘鄉
縣東望春門舟人待一客薄暮至聲似羅少純與問訊則乃見知詢爲

朱嶽秋秀才遠館城步尙須經武岡可自此同行至彼岸移泊西門夜月朗然殊無春色今日讀惜誦一篇未熟

十一日晴南風晏起見一橋乃朱津渡橋也僅十年不至已迷其上下自城至此十五里又十五里過山棗昔年與滌公相遇未相見處也其時余居明岡羅研翁居老虎壩匹馬來去川原林樹皆相識海內波蕩鄉里晏然今四方無塵而閭井蕭條令人有化鶴之感行三十里泊潭市至昏復行五里宿中川稍覺春煖四更後雨今日讀涉江篇

十二日晨雨未行濛濛至午行十五里泊連司渡看水上雨漚感憶懷庭久欲作挽誅之詞緣意緒太多反至稽滯

憂思獨增傷鬱鬱又踰春乘流觀飄雨念子始別長固知

聞喪久情響忽如親久要恨不哀歎又行十五里泊鷺陂灘晴

十三日晴微有北風帆行十五里蓋步頭附船人起載去又十五里側水

嶽嶽南衡精騰光照四遐雲龍驤興運宣文樂且儀之子懷瑾瑜幽獨久離家吳越不我知明珠反故浦羣賢盡和會大國有光華又十

五里黃馬洲又十五里泊陽唐彎

曰余非祥金選子利同心言行相怨
響護嫉尙不侵離會猶一情曾不怨

商參悠悠大暮辰委化共飛
沈豈效妻子泣胡然涕淫淫

十四日晴煊船版俱炙人倉中風涼余一絲同行客尙羊裘也

有身必何
悲俾也何

時忘行登鳳臺白日皎城岡伏龍儒長吟知我翼摧傷庭宇固嚴然
春花亦再陽反怨結重恩企踊毒中腸中離奄八秋念子山夜愁還情

彌大江要眇共夷猶人情戀所生勸我天彭留寧未午南風動地篙榜
知一朝窮棄余東海陳嚴霜復冥冥愛子隨重幽

至永豐僅十五里計行四時遣龍八覓舁夫久不來頃之麋至相爭待

其裝束畢出街令急行後者疑不肯進乃步行五六里見道旁茶店將

開肆婦女欣欣有銜惑之容此於風俗極敞然不可禁亦衆所樂正其

本者在興教耳若如此下手徒爲笑柄也舁至行二十里宿楊柳井土

語似若仁里者

十五日晴極煊可單衣行二十里青衣坪大市也又三十五里長塘鋪銀

線金線鋪在界領下昔年舊遊幾忘之矣既至乃如夢焉午惕界領未